

## Universal Declaration of Human Rights - Walloon

© 1996 – 2009 The Office of the High Commissioner for Human Rights

This HTML version prepared by the *UDHR in Unicode* project, <http://www.unicode.org/udhr>.

---

### DÉCLARÂCION UNIVERSÈLE DÈS DREÛTS D'L'OME

#### [Preamble]

Il a stu ad'mètu 'ne fêye po totes

Qui l'fondemint dè-l'libètè, dè-l djustice èt dè-l'pâye tot-avå l'monde, c'èst l'rik'nohnance dè-l'dignité qu'èst l'prôpe di tos lès-omes èt dè dè dreûts égâls qu'ils ont èt qu'on n'èlzi pout mèskeure;

Qui l'fêt' dè n'in rik'nohe ou dè foler ås pîds les dreûts d'l'ome ont k'dû sacwants a rabahî èt brutâlizer l's-ôtes d'ine tèle manière qui l'consyince di l'ûmanité ènn'a stu révoltêye;

Qui l'pus grand èspwér dè d'jins, c'èst l'avén'mint d'on monde wice qui lès-omes sèront libes dè djâser èt dè creûre, tot-z-èstant d'halés dè-l'sogne èt dè-l'mizère;

Qui lès dreûts d'l'ome divèt-èsse ptotéjés d'on rèdjime di dreût di télé dôrt qui l'ome ènn'arive nin a l'rèvole disconte l'abus dè pouvwér èt l'assèrvih'mint, fâte d'aveûr situ aconté èt après aveûr tot fèt po-z-èsse rik'nohou;

Qu'i fât mète èn-avant, å-d'-dizeûr di tot, l'amitié inte lès peûpes èt les nâcions;

Qui lès peûpes dè Nâcions-Unies ont volou r'dîre chal leû fwé divins lès dreûts naturéls di l'ome, divins l'dignité èt l'valeur dè d'jins, divins l'égâlitè dè dreûts inte lès-omes èt lès feumes, èt qu'il ont dit leû vol'té dè fé tot po mète èn-alèdje li progrès sociâl èt po mète è plèce dè todi mèyeûzès condicions dè viker divins 'ne libèrté todi plus grande;

Qui lès-Etats Mambes s'ont-st-égadjî a mète èn-ouve po d'bon li rèspèt dè dreûts d'l'ome èt d'sès vrêyes libèrtés tot-avå l'monde, avou on côp di spale di l'Organizâcion dè Nâcions-Unies;

Qu'ine minme îdèye di cès dreûts èt d'cès libèrtés-chal èst dè-l'pus hôte importance po poleûr tini vrêmint ciste ègadj'mint-la.

L'ASSIMBLÈYE GÉNÉRÂLE proclame li prezinte

DÉCLARÂCION UNIVERSÈLE DÈS DREÛTS D'L'OME come èstant lès valeurs qui tos lès peûpes èt totes lès nâcions divrît mète èn-ouve. Qui lès cis qui t'nèt l'vièrna dè sôciétés tot comme chaskeun' å rès, avou djoûrmay cisse Dèclarâcion è l'tiesse, sayèsse dè mète èn-avant li rèspèt d'cès dreûts èt libèrtés-chal, divins lès scoles èt l'educâcion po nn'ariver, pitchote a midjote, grâce a dè mèzeûres nacionâles èt internacionâles, a 'ne rik'nohance di cès dreûts èt d'cès libèrtés-la, po qu'i sèyèsse mètous èn-alèdje po d'bon tot avå l'monde, ot'tant po lès populâcions dè-Etats Mambes zèls minmes qui po lès cisses dè tères qui sont d'zos leû k'dûhance.

#### Artike prumî (1)

Tos lès-omes vinèt-st-å monde libes, èt so-l'minme pîd po çou qu'enn'èst d'leu dignité èt d'leus dreûts. I n'sont nin foû rêzon èt-z-ont-i leû consyince po zèls, çou qu'èlèzès deût miner a s'kidûre onk' po l'ôte tot come dè frés.

#### Artike deûzinme (2)

Chaskeun', seûy-t-i ome ou feume, pout fé valeur tos lès dreûts èt totes lès libèrtés qui nous sont rachou d'vins l'prezinte Dèclarâcion, èt n'pôrèt-on prinde nouk' po mons qu'i n'èst a cåse di s'race, dè-l'coleûr di s'pè, di s'lingadje, di çou qu'i creût, di sès-îdèyes so-l'politique ou so tot ôte tchwès, di qué pays qu'i provint, di s'condicion d'ritche ou d'pôve, dè-l'contrêye wice qu'il a vèyou l'djou ou bin d'tot minme qwè qui ç'seûye.

Di pus' nolu n'deût pâti dè-l'condicion di s'patrèye rapôrt âs-ôtes payis, qui l'contrêye ou l'payis di d'wice qu'i provint seyèsse indépandants, nin mèsse di zèls po d'bon ou bin rastrindou d'vins leûs dreûts, èt mǎgré tot çou qu'on pôreût tûzer di leû gouvèrnumint.

#### Artike treûzinme (3)

Chaskeun' a dreût a-l'vicârèye, a-l'îberté èt a-l'sûreté po lu minme.

#### Article qwatrinme (4)

Nolu n'sèrè t'nou come èsclāve ou ovrî sins salère, l'èclavadje di tote sôrt, tot come dè fé martichî dèès-èsclāves di tot l'minme quéle manîre sont disfindous.

#### Artike cinquinme (5)

Nolu n'pôrèt-èsse mǎ trêti, mètou a-l'torteûre, ou rabahi avou dèès cruwélès ponnes nin dègnes d'in-ome.

#### Artike sihinme (6)

Chaskeun' a l'dreût d'èsse rik'nohou tot-avå po çou qu'il èst sorlon si lwè tot come sès dreûts.

#### Artike sètinme (7)

Turtos sont so-l'minme pîd po d'avant li lwè èt turtos ont dreût d'èsse protégés d'-l'minme manîre pa li lwè. Turtos ont dreût a 'ne minme prôtèccion po n'nin èsse mètous so-l'costé d'ine manîre qu'îreût disconte li prézinte Dèclaråcion, mins ossu disconte to çou qu'pôreût miner a garanti onk èt nin l'ôte ou a tote sôrt di préférence.

#### Artike ûtinme (8)

Chaskeun' a l'dreût d's'aler plinde èt d'èsse ètindou po d'bon dè-l'justice compétinte di s'payis, di tot çou qu'sèreût fèt po mète a mǎ lès mèsse dreûts qu'îl sont rik'nohous dè-l'constitution ou bin dèès lwès.

#### Artike noûvinme (9)

Nolu n'pout-èsse sins rêzon tchoûki è-l'pote, tinou èprîh'né ou tchèssi foû di s'payis.

#### Artike dîhinme (10)

Chaskeun' a l'dreût d'èsse ètindou d'ine minme manîre, divant tot l'monde èt sins totès fètès-îdèyes, divant on tribunål indépandant èt d'jusse qui dècid'ré d'sès dreûts ou bin d'sès d'vwérs, tot come îl r'vint l'dreût di s'disfinde di çou qu'on îl r'proche ou bin d'çou qu'on l'acuse.

#### Artike onzinme (11)

1. Tot qu'î è-st-acusé d'ine mǎcule deût-èsse tinou po ènocint d'çou qu'on îl r'proche disqu'a tant qu'i seûye rik'nohou coupâbe, èco fât-i qui s-procès seûye public, qui totes lès règues sèyèsse rèspèctêyes èt qu'il âye avou l'dreût di s'disfinde po d'bon.

2. Nolu n'pout-èsse condâné po 'ne sacwè qu'il a fèt ou qu'i n'a nin volou fé a on moumint wice qui, sorlon lès lwès di s'payis ou dè monde, çouchal n'èsteût nin co 'ne fâte. De-l'minme manîre, on n'è-l'pôre puni pus fwèrt qu'i n'l'âreût stu å moumint wice qui l'afêre s'a passé.

#### Artike dozinme (12)

Nouk ni pôrê aler hêrer s'narène divins l'vicârèye, li famille d'in-ôte, brokî è s'mohone ou bin nahî d'vins sès lètes èt sès papîs, ni l'ac'sûre divins si-oneûr ou s'rèputåcion. Chaskeun' a l'dreût d'èsse protégé dèès lwès disconte dèès s'fètès manîres.

#### Artike trazinme (13)

1. Chaskeun' a l'dreût d'aler tot wice qu'i vout d'vins 'n-Etat èt d'î tchûzi come i vout l'plèce la qu'i vout d'mani.
2. Chaskeun' a l'dreût dè qwiter tot l'minme dué payis, minme li sonk, èt dè raler è s'payis qwand i lî plèt.

#### Artike catwazinme (14)

1. S'il èst k'tchèssî, chaque ome a l'dreût dè cwèri a s'ahouter èt dè trover on ratrèt divins dès-ôtes payis.
2. On n'si pout nin chèrvi di ç'dreût la s'on-z-èst porsûvou po 'ne mâcule qui li lwè réprouve ou po dès keûres qui vont disconte çou qu'lès Nâcion-Unies volèt mète èn-avant.

#### Artike qwinzinme (15)

1. Chaskeun' a l'dreût a 'ne nacionâlitè.
2. On n'pout r'prinde a nolu, èt sins rêzon, si nacionâlitè, tot comme si dreût d'ennè candjî.

#### Artike sazinme (16)

1. Si vite qu'enn'ont l'adje, ome èt feume, di tot l'minme quéle race, nacionâlitè ou r'lidjon, ont l'dreût di s'marier èt dè fonder 'ne famille. Il ont lès minmes dreûts po çou qu'enn'èst dè marièdje, tant qu'i sont mariés ou s'i m'nèt a d'vôrcer.
2. Li marièdje ni s'pout fé qui dè-l'plinne vol'té èt dè-l'tchûze dès cis qu's'ont promètou lès-acwèrdances.
3. Li famille c'èst l'vrêye fondemint dè-l'société, lî r'vint l'dreût d'ine prôtècsion dè-l'sôciété èt d'l'Etat.

#### Artike dîsètinme (17)

1. Tot l'monde, seûye-t-i a lu tot seû ou bin avou dès-ôtes, a l'dreût d'aveûr dès bins.
2. On n'pout r'prinde sès bins a nolu, sins bone rêzon.

#### Artike dîhûtinme (18)

Chaskeun' a l'dreût dè tûzer çou qu'i vout, d'aveûr si consyince por lu èt dè priyî tot l'minme qué Bon Diu, çoula vout dire ossu qu'i pout candjî di r'lidjon ou bin candjî d'idèye. Tot seû ou bin avou dès k'pagnons, è s'mohone to come å d'fou, i pout dire tot hôt çou qu'i creût, l'aprinde ås-èfants, tot come ènnè fé-ârèmus ou lès cérémon'rèyes.

#### Artike dî-noûvinme (19)

Chaskeun' a l'dreût d'sès-opinions èt l'libèrté d'èlzès d'ner a k'nohe, çou qui vout dire qu'on nè-l'pôre toûrmèter po çou qu'i tûze èt qu'i pout cwèri sins rat'na lès informâcions come lès idèyes, ènnè r'çure èt 'nnè ripåde lådje èt lon, minme foû payis, èt di tot l'minme quéle manière.

#### Artike vintinme (20)

1. Chaskeun' a l'dreût di s'rapoûler ou d's'acolèber po 'ne bone cåse.
2. Nolu n'pout-èsse fwèrci dè fé pàrtèye d'ine associâcion.

#### Artike vint-euninme (21)

1. I r'vint a chaskeun' li dreût dè prinde si pàrt po çou qu'enn'èst dè tinre li vièrna di s'payis, seûye-t-i dirèctèmint, ou bin tot tchûzihant libèrèmint dès r'pruzintants.
2. Chaskeun' a l'minme dreût dè prinde on posse divins l'administrâcion dis s'payis.

3. Li vol'té dè peûpe c'èst l'fondemint dè pouvwèr d'on gouvèrnumint; cisse vol'té-là si deût d'ner a k'nohe divins dès-èlèc'cions qui sùvèt l'dreût dè djeû, qu'on deût adjèrcî a tchoke, avou l'sufradje ûniversèl : in-ome ine vwè, èt â vôte secrèt, ou di tot l'minme quèle ôte manîre qui rèspeceye li lîberté dè ci qui deût d'ner s'vwès.

#### Artike vint'deûzinme (22)

Chaskeun' come mambe dè-l'sôciété, a dreût a-l'sécurité sociâle; èlle èst fondêye po qu'l'ome âye çou qu'a dandjî po s'dignité come po frudjî d'cwèr èt âme. Chaque pays deût fé çou qu'i pout sorlon sès ritchèsses èt si-organisâcion, mins s'deût-i poleûr compter ossu so on côp di spale dès-ôtès nâcions.

#### Artike vint'treûzinme (23)

1. Chaskeun' a l'dreût d'ovrer, dè tchûzi l'mesti qu'lî plêt, dè-l'fé divins dès bonès condicions èt d'esse aasûré disconte li chômedje.
2. Turtos on dreût, sins nôle diférince, a on minme salère po on minme ovrèdje.
3. Tos lès cis qu'ovrèt on l'dreût d'esse payis d'tèle sôrt qu'il âyèsse assez po viker èt po fé viker leû famille, sins qwè elzi r'vinrè dè toucherd'ine manîre ou d'ine ôte, ine sacwè d'pus' qui çou qu'gâgnèt.
4. Chaskeun' a l'dreût d'èmantchî avou dès-otes dès sindicats èt d'fé pàrtèye d'on sindicat po disfinde sès-intèrêts.

#### Artike vint'cwatrinme (24)

Chaskeun' a l'dreût di s'ripwèzer èt dè prinde dè bon tins. Insi n'deût-on nin l'oblidjî d'ovrer a fwèce sins r'las èt foû mèzeûre èt lî r'vint-i dès condjîs payis â bout d'on tins.

#### Artike vint'cinquinme (25)

1. Chaskeun' a l'dreût dè gâgni assez po s'poleûr sognî èt-z-aveûr bon, por lu-minme èt s'famile, insi po çou qu'enn'èst dè magnî, di s'moussî, di s'lodjî, dè payî l'doctor èt l'apoticâre ou bin lès chèrvices qu'enn'a dandjî. Chaskeun' a l'dreût a-l'sécurité s'il èst sins-ovrèdje, malåde, invalide, vèf, qwand i d'vint vî ou qwand i n'a pus nôle rintrêye di çans' la qu'ci n'èst nin di s'fâte.
2. Les mames èt lès-èfants ont pôr li dreût d'esse êdis. Tos lès-èfants, qu'i sèyèsse vinous â monde di djins mariés ou foû dè sacrumint divèt-esse protèjés dè-l'minme manîre.

#### Article vint'sîhinme (26)

1. Chaskeun' a l'dreût d'aler è scole. Li scole ni deût rin coster, dè mons po çou qu'enn'èst dès p'titès scoles la qu'tot l'monde deût-esse oblidjî d'aler. On deût trover tot-avâ dès scoles tècniques èt profèssionèles ; tot l'monde so-l'minme pîd deû poleûr fé dès hôtes-études sorlon sès mérites èt sès quâlités.
2. L'èducâcion deût pèrmète a chaskeun' dè fé frudjî sès capâcités èt deût rinde pus fwèrt li rèspeçt dès dreûts d'l'ome èt dès prumîrès lîbertés. Ele deût aminer les djins di tot l'minme quèle race ou r'lidjon, lès peûpes èt lès nâcions, a s'mî comprinde èt s'supwèrter, tot fant hôt avou lès Nâcions-Unies po çou qu'èst dè garanti l'pâye.
3. C'è-st-â prumî rang âs parints qu'i r'vint dè tchûzi l'mèyeuse sicole po leûs-èfants.

#### Artike vint'sètinme (27)

1. Chaskeun' a l'dreût dè prinde libèrèmint pàrt a çou qui fèt l'vèye culturèle dè-l'comunôté, dè profiter dès-ârts èt dè prinde pàrt âs progrès dè-l'syince èt tot çou qu'aminèt d'bon.
2. Chaskeun' a l'dreût dè veûy garanti sès-intérêts po dès-oûves di syince, di scriyèdje ou d'ârtisse, qu'ennè l'ôteur.

#### Artike vint'ûtinme (28)

C'è-st-on dreût po chaskeun' qui l'monde rote di tèle manîre qui, po 'ne classe ou l'ôte dè-l'société come d'on payis a l'ôte, lès dreûts èt lès libertés qui s'trovèt chal rachous si polèsse mète èn-alèdje.

#### Artike vint'noûvinme (29)

1. L'ome a dès dwèrs po l'communôté wice qu'i pout dègn'mint crèhe èt viker.
2. Po çou qu'enn'est d'sès dreûts èt d'sès libertés, chaskeun' divrèt d'morer d'vins lès-arôyes qui li lwè a mètou d'usse po garanti li rik'nohance èt l'respèt d's libertés d's-ôtes, dè-l'moråle, dè-l'tranquilité èt dè-l'binåhisté d'turtos divins 'ne sôciété d'démocrâtes.
3. Cès dreûts èt cès libertés-la ni spôront mây mète come d's hames è-l'vôye di çou qu'volèt fé lès Nâcions-Unies.

#### Artike trintinme (30)

Rin di tot çou quis'trouve divins cisse Dèclarâcion-chal ni pout d'ner a tûzer d'in-Etat ou d'ine sakî, qu'il a l'dreût dè fé tot l'minme qwè qui pôreût mète a må lès dreûts èt lès libertés qu'î sont rachous.

---